

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 61 (1976)
Heft: 7

Artikel: Pieder Tuor (19876-1957)
Autor: Defuns, Marcus
DOI: <https://doi.org/10.5169/seals-881805>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.04.2026

ETH-Bibliothek Zürich, E-Periodica, <https://www.e-periodica.ch>

Pieder Tuor (1876–1957)

da Marcus Defuns

Uonn festivescha la Romontschia il tschienavel anniversari dalla nasschientscha dad in da ses fegls meriteivels: Pieder Tuor. Motiv avunda per igl Ischi semestril da seregurdar dad el, il redactur fideivel digl Ischi dils 1907 tochen ils 1926, il commember attaschau dalla Romania per veta duronta.

Origin e formaziun

Havess la mort buca tuccau ils 1882 prematuradamein siu bab, in Grischun emigraus ad Aquila en las Abbruzzas (Italia), Pieder Tuor fuss forsa mai daventaus il valent giurist svizzer ed il fervent promotur dil romontsch. Mo la mumma tuorna suenter la mort dil bab cun il mattatsch da sis onns a Lags, siu vitg natal; il vitg, nua che Pieder dueva s'animar per pievel e cultura romontscha.

Finida la scola rurala daventa il giuven svegliau student claustral a Mustér; silsuenter serenda el al collegi da Sviz. Fatga la matura sededichescha el a Ruma ed a Friburg al studi dalla filosofia e dils lungatgs classics. En buca ditg mida Pieder Tuor meini e s'inscriva a Friburg per la giurisprudenza. Ei suonda divers semesters ordeifer, a Berna ed a Berlin. Sin animaziun da Casper Decurtins, da quei temps professor per historia culturala alla universitad da Friburg ch'el haveva sez gidau a fundar, scriva Pieder Tuor sia dissertaziun sur «Ils libers de Lags» (1903).

Il giurist svizzer

Schegie che sia eccellente lavur doctorala pertuccava l'istoria dil dretg public medieval en Rezia, vegn Pieder Tuor beinprest clamaus a Friburg sco professor per il dretg roman. El serenda ladinamein a Vienna per approfondir leu sias enconuschientschas en quella scienza ton subtila. Gia cun ventganov onns docescha el a Friburg il dretg roman.

Igl onn academic 1919/20 daventa professor Tuor rector dalla universitad da Friburg. Alla fin da quei onn suonda el in clom dalla universitad da Genevra, sorprendend leu il cateder per dretg civil, dretg d'obligaziuns e

dretg commercial. Gia dus onns pli tard vegn el clamaus alla universitad da Berna, nua ch'el docescha il dretg roman ed il dretg d'ierta tochen alla fin da sia activitad professorala.

Alla scienza giuridica svizra ha Pieder Tuor regalau siu cumpendi «Il cudsch civil svizzer», in mied instructiv voluminus per students, giurists, derschaders e laics che ei dacuort cumparius en novavla ediziun e che vala aunc oz per autoritativs. Plinavon publichescha el duas lavurs prevedidas surtut per il laic partenent il far testament e la differenza denter testament e contract d'ierta. Sia ovra giuridica meisterila ei secapescha il commentari sur dil dretg d'ierta, cumparius en successiuns dils 1912 tochen ils 1929. Duront ils onns da pensiun suenter ils 1946 ha Pieder Tuor aunc giu la forza da preparar l'emprema mesadad da siu opus fundamental per la secunda ediziun, part integrala – ensemen cun l'ulteriura mesadad che prof. Vito Piconi ha reediù – dalla retscha autoritativa dil «Commentari da Berna sur dil dretg privat svizzer».

Il promotur romontsch

En quest liug descha ei surtut da seregurdar da Pieder Tuor sco Romontsch. El ei staus alla tgina dalla Romania avon otgonta onns sco confundatur. El ha presidiau sco tierz la giuvna uniun romontscha dils 1898 tochen ils 1901. In triep onns pli tard ha el surpriu ord ils mauns da Casper Decurtins, igl iniziand e mentor dalla renaschientscha romontscha, la redacziun digl Ischi che quel haveva fundau e redigiu dils 1897 tochen ils 1906.

Pieder Tuor tgira las annadas IX tochen XX (1907–1926) digl Ischi che cumpareva da gliez temps buca mintga onn. El ha buca mo redigiu, el ha era scret egl organ dalla Romania. S'entelli che el s'interessava il pli per damondas da dretg e historia. L'entschatta dat el gia ils 1903 en Ischi 7 cun ina oreifra lavur giuridica-culturala sur «Ils proverbis giuridics romontschs». Ei vala la peina da reproducir cheu enqual exempel, schegie ch'ei tonscha buca dad aschuntar mintgamai l'explicaziun: «recli cuoza semper»; «il dretg dueian ins buca miserar ora cun curtauna tgiembla»; «cun basaret cala la parentella bein ed endretg»; «tgi che marida la vieua, marida ses deivets»; «la rauba ha da turnar a tschep»; «tgi che ha catschau en cadeinas, metta en il muvel»; «in tierm cloma l'auter»; «ils maghers van suren»; «ins sto schar ir la crappa engiu ed il fem ensi»; «tgi che rumpa paga»; «ins sa co ins va en casa cumin, mo buca co ins vegn anora».



In tshuppel onns pli tard regala Pieder Tuor alla Romontschia ina outra lavur fundamentala: «Ils documents giuridics romontschs». En quei tractat, publicaus en Ischi 20, dat il magister universitari sco emprem in mal-

etg systematic dil patrimoni giuridic romontsch, explicond las numerusas fontaunas da dretg e tschentond quellas el connex necessari cun il svilup general dil dretg en l'Europa centrala.

Igl onn 1908 cumpara la translaziun romontscha dil Cudisch civil svizzer, la quala il professor da dretg dalla universitad da Friburg haveva procurau sin incarica dil Cussegl federal. Pieder Tuor ha fatg cheu lavur cumpleina, purschend buca mo ina translaziun verbala, mobein adaptond il text subtil tudestg alla capientscha dil Romontsch.

En l'annada 10 digl Ischi ha Pieder Tuor publicau sia suletta emprova belletristica: «Tresta Nadal-notg». Il specialist svizzer dil dretg d'ierta offerscha era al publicum romontsch siu agid, aschia cun siu tractat en Ischi 12: «Sul far testament» ed ils 1913 el Calender Romontsch: «Il testament notarial tenor il Cudisch civil svizzer».

Zun interessantas ein dil pugn da vesta cultur-historic las lavurs da Pieder Tuor en Ischi 7, 13 e 14 sur: «Treis process ord il temps vegl», «La passiun de Sumvitg dil temps dil domini franzos 1801» e «Igl origin dil peleginadi de Ziteil».

Adina puspei aulza il professor romontsch a Friburg e Berna sia vusch cura ch'ei setracta da defender ils interess dalla Romontschia eifer ed ordeifer nossas scheinas. Siu meini fa el era paleis al pievel romontsch, aschia en Ischi 14: «Nus Romontschs ed il Talian», en Ischi 18: «La muntada nazionala dil lungatg romontsch», enzanua auter: «Carschen e digren dil pievel romontsch?», en Ischi 24: «La populaziun romontscha el Grischun tenor la dumbraziun federala de 1930».

S'entelli che l'istoria e las instituziuns dalla Ligia Grischa han adina captivau Pieder Tuor, il doctur che haveva dissertau sur «Ils libers de Lags». Egl Ischi dils 1924 rauenta el sur «La fundaziun della Ligia Grischa, tenor ils vegls cronists» e publichescha la Brev dalla Ligia versiun romontscha. A caschun d'in auter giubileum, 650 onns Ligia dil Rütli, translatescha el la Brev dalla Ligia federala da 1291 e publichescha en quei connex in concept en Ischi 28: «Libertad svizzera e libertad grischuna».

In onn pli tard cumpara la davosa lavur pli gronda da Pieder Tuor: la translaziun romontscha dil Cudisch penal svizzer. Il professor da Berna era igl um predestinau per questa caussa ed el ha era cheu fatg lavur entira.

Pieder Tuor, naschius avon tschien onns e morts avon strusch dus decennis, ha relaschau al pievel romontsch ed als giurists svizzers ina ovra litterara da peisa. La Romania, alla quala el ei staus fideivels tochen la mort ed alla quala el ha ultra da quei fatg in legat, ha tutta raschun da salvar Pieder Tuor en regurdientscha engrazieivla.